



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Russia-i Ukraine nung blood bank, university amak

Stefanos Tsitsipas-i ATP Los Cabos title benogo

VOL. XX NO. 295 (ADOK 295) DIMAPUR TENTONÜ (MONDAY) LUROI (AUGUST) 07, 2023 ₹ 5.00

Railway stations 508 yanglushitsü project PM-i semzüksü, Dimapur dena lir

Dimapur, Luroi/August 06 (TYO): Amrit Bharat Station Scheme kübok linük nung sen crore 24,470 dak tema agi Railway stations 508 yanglushitsü asoshi nungshilong ka Ato Kilonser Narendra Modi-i Deobarnü video conference ajanga azüngsüogo.

Item station 508 ya state aser union territories 27 nung lir aser Dimapur Railway station densema Northeast Frontier Railway nunga station 56 lir.

Iba sentong nung jembidang, railway station yanglushiba project ya linük nung ki o jen terenlok asoshi sentong tuluka asütsü aser tajanzük ya linük nung aliba state ajunga nung alitsü, ta ato kilonseri ashi.

Station aika tanü asüng tensa den apet yangluba ajanga linük nung terenlok tasen angutsü, kechiaser linük semdang temi yangji mezüng rangloktsü, ta pai ashi.

Stations tem upgrade asüba ajanga tourism tali ulushiba kisüng masü saka anasa aliba tesemtem nung rongsenketzüng maparen nungmesotsü. 'One Station One Product' scheme ajanga aluyimertem yaritsü aser district tenüng ajungketsü, ta pai ashi.

Pei senmang nung tejak tentetsü asoshi Azadi Ka Amrit Kaal nung linüki pangzüng yangluogo, ta ato kilonseri ashi.

"Item Amrit Railway stations ya pei senmang nung tejak tentetba temaitsü ka asütsü aser senso ajak molungiang nung nüma tangtetsü. Amrit Stations ajanga India indang sobaliba sayutsü aser yamaji Jaipur Railway Stations nung Hawa

Mahal indang sayutsü aser Nagaland indang Dimapur station nung kin 16 indang sayutsü," ta pai ashi.

Railway station shia ya linük nung tanü tendak tejangraba aser akhi senmangtem temaitsü asütsü. Ato kilonseri 'Bharat Gaurav Yatra Trains' tashi itshtitsü indanga jembia liasü, koba ajanga puti otsü nung tongtipang tesemtem aser temeshi tesemtem sendakteptsü.

Northeast nung railway extension indang jembidang, line tiba akumtsü, gauge, conversion, electrification aser lenmang tasen atema mapa kanga kera inyaktar, ta pai ashi.

"Yakta Northeast nung state capital ajunga railway network agi sendakteptsü," ta Modi-i ashi.

Nagaland nunga küm 100 sülen station tanabuba yangluogo, ta pai ashi. "Region nung railway lines tasen commission asüba maparen asemsü agi timba kumogo," ta pai ashi.

Green buildings indang jenjang nung Amrit stations tem yanglutsü. 2030 tashinung India indang railway network ya 'net zero emissions' nung jajaba linük ka akumtsü, ta PM Modi-i ashi.

Iba project semzükba sentong nung Dimapur Railway station nung jembidang Nagaland Governor La Ganesan-i ashiba agi, Northeast region nung world class railway station ama yanglutsü asoshi station 56 shimtetba ronung Dimapur densema ajanga Nagaland nung aliba nüburtem kanga pelar.

(Maneni tapak 2 nung...)

Manipur video dak sendakba nung police pongu anentsü

Imphal, Luroi/August 06 (Agencies): Manipur nung tangokba video ka alima sünga prokshiba dak sendakba ken o nung Manipur police pongu khen asoshi mapa nungi anenja lir.

Iba video ya May 4 nü Kangpokpi district nung Meitei nung tebur telok kati Kuki tsür ana mangsa yimtung nung tashiyim amshia anir senzüba indang lir.

Khen asoshi mapa nungi anenja aliba Manipur police personnel pongu rongnung Thoubal district kübok Nongpok Sekmai police station indang officer in-charge densema lir.

Iba video dak sendakba nung Nongpok Sekmai police station indang office in-charge mapa nungi khen atema anentsüba mechi July 31 nü Meitei tsür timba sür nisung telok kati Thoubal district kübok iba police station ya sapang aser shibanga yutsü.

May 4 nü Kuki tsür ana yimtung nung mangsa anir

senzüba nisung telok mazüoktetba mechi Nongpok Sekmai police station indang officer in-charge ya mapa nungi khen atema anentsü.

Nongpok Sekmai police station indang officer in-charge, K Premkumar Mangang ya Meitei kin nungi lir.

July 31 nü iba police station shibangtsüba sülen Meitei nungertem yagi police station telungi aidak 'sandbags' tem nangtena yutsü ta ashir.

Ajisüaka Manipur police ketdangsur kar iba tesemi arua nisungtem ain adoka aliba süngzüksüba sülen tensa azüoktet.

Item nisungtem yagi K Premkumar Mangang mapa nungi khen atema anenja aliba totuyuba tangsa agienang ta takhangba agüja liasü, kechiaser district nung May 3 aser 4 nü temzüng-ozüng ajunga raksar tetsür ana mangsa anir senzüba telok pai azüoktsü mokoki liasü, ta parnokki ashi.

Shillong nung Aooshi aser Sobaliba renloktsü atema inyakttsü



Ao Senso Telongjem Shillong pur Silver Jubilee mung tembanga agiba Sobaliba Sütoksünem sentong nung nungtugo kentener Wb. Tiameren Aier aser Shillong nung alir lanurtemi shilem agiba noksa nung angur

Dimapur, August 06 (TYO) : Shillong nung alir Aor telongjemi, ano, tang nungi Ao oshi aser Aor sobaliba tajungtem renloktsüba mapa nung tali temulung tagütsüba agüja inyakttsü asoshi telemtetba agiogo.

Iba telemtetba ya Ao Senso Telongjem Shillong tenzüker küm 25 ajungba Jubilee mung tenüng nung lemteba pangzüngtem rongnung ka liasü. Ano, ASTS-isa tang nungi Shillong nung azünger chirnurtem shirnokisa class 10 ase 12 nung tangar dang nungi temaba takok jenjang bener arutsüdir, pa mesüra la nem konang nungasang aser senpet agütsütsü ta sangdongogo.

Item ama kaketshisatsü aser sobaliba renloktsüba sentongtem asoshi ASTS Silver Jubilee tenüng nung senotsü balaka bendena rezünga yutsüogo. ASTS tenzüker küm 25 ajungba sentong ya Luroi (August) 4 aser 5 nü Naga Community Hall, Shillong nung takok ngua mongogo.

Iba jubilee mung sentong tentinü tongti o jembir, Wb.K. Temjen Jamir, Tir Yimyim yimozüiluri ASTS tenzüka arur ajak nem tenüngsang agüja ashidang, " Jubilee mung ya benjongmung ka dang masü saka ibai Tsüngrem aser nisungtem den tesendaktep tasen küma yanglushiba aser ano Tsüngrem aser nüboritem asoshi tajungba inyakttsü mulungtetsüba mapang

ka lir," ta metetdakttsü.

Paisa " Telongjem aser Terenlok" onük nung jembidang, " longjemeren lok mapa inyakttsü atema renloktsü nungdaker ser nung merenloktetba tesemtem rongnung - Ochimashi tesem nung ochi agi akoktsü merangtsü; party aser electoral politics dang tali mejembii rongsen poktetdakttsü indang tali jembia inyakttsü, pei boktsüng dang mebilemi tangar makaba kaa kümaktsütsü bilema business inyakttsü, tangatetba tasen nung asen sobaliba mesendoki Tsüngremi mulungba mapa inyakttsü aser asenok kija bendangbendanga melii asenok rongnung aser tangar Naga kintem dena tesendaktep tajung lia sobalitsü nungdakba tesemtem asütsü," ta metetdakttsü.

" Tanü asenok Khristan asüba agidang tangar mesüka alir, ajisüaka asenoki Ochi sendoka yutsür, tanga ochi mesükba dangi meyipra, tanü asen kidanger state nung atalokba amai, asenoka talidak aser tejenokdak makatsüsa lendong tulu ataloktsü ana nung lir," ta tongti o jembirisa metetdakttsü.

Paisa yimten yimsüsüba ren nung terenlok shitak bener arutetsüsa sentong yanglutetsü atema, Science aser technology nung mongin nisungtem aser professional-tem government nung anioka amshitsü nungdakba ka repringteta lemsatep.

Iba kasa sentong nung ASTS

samanirtem rongnungi Wb.T. Yanger Pongen aser Wb.C. Apok Jamir nati tepela aser tajungshi o jembia liasü aser Ao Senso Telongjem Welfare, Guwahati nungi aser ano Assistant Resident Commissioner, Nagaland House Shillong, Wt. Diana Patton nungi salem osang metetdakttsü.

Iba sentong nunga Shillong nung alir tanurtemi Jubilee naklo sangro azüng aser Temulung Tembar telok aser Jubilee choir nati Jubilee naroküm ken tena telok mulung ayokngzük.

Iba Jubileemung takok angutsüsa yaritepertem ajak nem tenüngsang agütsüba melepzüng o Jubilee Asameyang Luden nung tayonger Wb. Butesen Ozüküm aser ASTS nung tadong tir Wb. KÜmzüc Kichu nati metetdakttsü. Iba sentong tenzüka Ao Baptist Arogo, Shillong nung sanüker Rev. Dr. Meyu Changkirii sarsasadem aser Rev. L.M. Yangeri sarasadema tembang. Iba sentong nung Wt. Anungla Bendang sentong lenir liasü.

Iba Jubilee mung tembanga Sobaliba Sütoksünem sentong liasü. Iba sentong nung nungtugo kentener Wb. Tiameren Aier tongti ser tangar kintem dena joaka longsulongsua shilem agiogo.

Tang ya Shillong nung alir Aor kilen 122 den anükapang kibong 52 shi lir aser Shillong nung azünger kaketsüshir noklang dak tema lir.

Kohima nung Employees' State Insurance indang awareness agütsü

Kohima, Luroi/August 06 (TYO): Labour Department ajanga Employees' State Insurance Corporation (ESIC) den lungjemer August 6, 2023 nü Awareness cum Medical Health Camp and Aadhaar Seeding sentong ayongzüka liasü.

Iba sentong ya Directorate of Employment, Skill Development & Entrepreneurship, Kohima indang Conference Hall nung agia liasü, kong Zaremo Kikon, Asst. Labour Commissioner, Kohima menden liasü aser employees tem pelashishia agizükba den ESI Scheme nung temolung agütsütsü aser iba scheme kübok aliba employees nem awareness agütsütsü nungdakba indang jembia.

Iba sentong nung Mario

Manirhii, Asst. Director of ESIC Regional Office Guwahati ajanga ESI nung tajanzük aliba indang presentation agütsü aser employees tem tenüng zülüokba nung employer indang shilem aser teinyakttsü indang ashi.

ESI ya Ministry of Labour & Employment kübok social security Health Insurance Scheme ka lir aser ESI Corporation ajanga ketdang asür, ta pai ashi.

Iba scheme ya itasen 21,000 mesüra tajemba agir mapa inyaker nisung ter mesür timba aliba factory aser danga establishment atema lir. Mapa agütsü aser mapa inyaker nungi iba ESI atema sen ya shilem 3.25 aser .75 bendener. Iba scheme ajanga insure süa aliba nisung, parnok indang apuani aser parnok dak metaloka alirtem

asoshi Medical Benefit aser Sickness Benefit, Disablement Benefit, Dependant Benefit, aser Maternity Benefit agütsü, ta ashi.

Iba scheme nung register masür nem temerenshi agütsütsü aser yangji 'interest, damages aser retrospective mandatory contributions' densema lir. Anungji item temerenshi mangutsü mechi establishment temi akok tashi tekeraba nung register asütsüla, ta ajungshi.

Establishment aser mapa inyaker registration ya Shram Suvidha Portal nung agitetsü, ta ashi.

Iba sentong ya talisa Kohima nung Keziekie aser New Secretariat tsüngta aliba establishment tem nung rangloker ayongzüka liasü.

(Maneni tapak 2 nung...)

Advisor Ikuto-i Kohima nung Nagaland Coffee Shop semzüksü



Kohima, Luroi/August 5 (TYO): Advisor for Land Resources, G Ikuto Zhimomi-i Honibarnü Kohima kübok Old Taxi Stand nung Nagaland Coffee Shop semzüksüogo.

Dimapur nung mezüngbuba lapokba sülen Kohima nung Nagaland Coffee tanabuba kongsang lir. Iba dokan ya Co-Founder aser Managing Director Vivito Yeptho-i achayanger.

Sentong nung o jembiba mapang Advisor Zhimomi-i, lanurtem entrepreneurship nung tetsüing ajemokba aser coffee shishilembaba nung shilem agiba ngua pa kanga ajungmesor, ta ashi.

Paisa, state sorkari aluyimertem aser entrepreneur tem nem teyari agütsüsü atema coffee tsünütsü ajungshia arudar, ta ashiba den dokan mesüra café lapokba ya iba sentong den kanga tapet, ta shisem.

Advisor-i ashiba agi, sorkari züngdemer aliba lanur shirnok

mapa mongui lir parnok entrepreneur kümdaktsüsü nükjidong lir. Local entrepreneur temi Chief Minister's Micro Finance Scheme nungi loan agitettsü ta shia, pai state nung yakta entrepreneur tem aika akümtsü temulung lema bilemba lemsatepa liasü.

State nung mapa bushir 70,000 dak tema state sorkar kübok züngoksema lir ta shia pai, lanurtemi state nung mapa manguba tebilemtsü bentettsü atema entrepreneur küma local lanurtem mapa nung anioktsü asoshi inyaktüsü ta ashi.

Sentong nungsa Director of Land Resources Department, Albert Ngullie-i, department-i 2014 küm nungi coffee tsünütsü atema inyaka arudar aser Coffee Board of India den longjemer 2030 küm tashi nungbo ali hectare 50,000 ayimjema coffee atemtsü nükjidong aliba lemsatep.

Paisa, Nagaland nung nüburtemi timbai süngo ajemer

saka tawa tanü coffee-a ajem tenzükogo, ta ashi.

Maneni pai, department-i coffee tsünüba dak sendakba nung nüburtem nem tangazükba agütsüsü aser entrepreneur aser züngzüker mapa mangu aliba lanurtem nem teyari agütsüsü ta ashi.

North East nung coffee timtiba adokdaktsüba state ka ama Nagaland nungi coffee lu ayimer aser entrepreneur tenet World Coffee Conference nung shilem agitsü, koba September ita Bangalore nung agitsü lir ta pai metetdaktsü.

Sentong nungsa Nagaland Coffee MD Vivito Yeptho-i, Nagaland nung coffee entrepreneur ka ama pa tajangshiba lemsatepa liasü.

Iba sentong ya Viketou Chupuo lenisüba nung agi aser Atuna Shikhu-i ken tajung ka tena liasü. Maneni City Church Kohima pastor Rev Kedo Peseyie-i iba dokan meshiteta sarasademja liasü.

Nagaland CM-i asükhu lemsatep

Dimapur, Luroi/August 6 (TYO): Nagaland Chief Minister Neiphiu Rio-i sangdong ka ajanga, August 6 nü Dimapur nung taoba Health & Family Welfare Principal Director, Dr. T. Lhouvi Nakhro asüba osang angazüka temulung koremba lemsatepogo.

Dr. T. Lhouvi Nakhro ya kangdang tindang aser meranga inyakba medical doctor aser ketdangsür ka liasü. Pai mapa balala nung state sorkar bendanga agüja aser tejangraba tulu nung tenzükogo. Pa kanga dang tesüingjem nisung ka liasü,

shibai ken o kecha mashishi-i pa mapa aremzüka inyaka aruogo. Pa teyarinü nisung ka liasü aser nüngdaka aliba purtem kodanga sentoka metoktsü. Pa mapa nungi aneba sülena lokti tenzükba nung shilem agia aruogo.

Dr. Lhouvi ya kanga dang ajemaluba nisung ka liasü aser pa yimyayimpong tajung asüba agi nüburtem aikati pa kanga meima liasü. Pa asüba ya kü atema-a takoksa tulu. Küna mapang talangka nung medemer süa aruogo aser tajangshiba tajung aika lir. Pa asüba ajanga tawa ka adokdaktsüogo, koba

süngdaktsüsü asoshi tasak asütsü. Ajisüaka asenoki pa taküm asoshi pelatepti aser Tsüngrem nem tenüngsang agütsüdi, ta CM-isa ashi.

Mangyim tejashi tia nung aliba mapang ozü kibong-i asür kinungertem den asükhu lemsateper aser tulusang Tsüngremi iba mangyimjashi khuret koktettsü atema parnok nem tasü tait tanüla aser anisüngzük agüjang ta sarasademtsür. Asür tanüla teti tatem makadak anisüngzükdakjang, ta kasa sangdong ajanga CM-i lemsatep.

Rangapahar Military Station nung Azadi Ka Amrit Mahotsav amung



Dimapur, Luroi/August 05 (TYO): Azadi Ka Amrit Mahotsav nungtem nung Rangapahar Military, Dimapur nung Amrit Yuva Kalotsav sentong ayongzüka liasü.

Iba sentong nung North East indang sobaliba aser yimsü-yimbong tem sayua liasü.

Sangeet Natak Akademi kübok iba amala sentong aika

linük tesem balala nung ayongzüka arur aser Rangapahar Military Station nung ayongzüka ya sentong 20 buba alitsü.

Iba sentong ya August 1-3, 2023 anogotem agia liasü aser iba mapang classical music, saya balala aser jilushi sayua liasü.

Iba sentong tembangba anogo nung Banaras Hindu

University ajanga Kathak aser Manipuri play sayua liasü.

Iba sentong ya August 1 nü Nagaland Governor La. Ganesan-i tenzüksü, kong tetushi tesemdang Spear Corps Commander Lt Gen Harjeet Singh Sahi, AVSM, YSM, SM liasü aser iba sentong nung Joravarsinh Yadav, Vice-Chairman, Sangeet Natak Akademi dena liasü.

Sainik School Punglwa nung "Eat Right School" ayongzüka agi

Dimapur, Luroi/August 6 (TYO): Chief Medical Officer's Office Dimapur tawabangba kübok Food Safety Administration Dimapur Zone-i ayongzüka August 5 nü Peren District kübok Sainik School Punglwa nung Eat Right School ayongzüka agiogo.

Food Safety & Standards Act, 2006 kübok Food Safety and Standards Authority of India (FSSAI)-i India nung aliba nüburtem atema chiyongtsü tachitsü tapet aser tajung agütsüsü meranger. Anungji FSSAI-i, Eat Right India movement ajanga nung nung nem sustainable chiyongtsü aser iba den temang nung teyari agütsüba chiyongtsü tapet aser tajung agütsüsü atema linük nung food system melenshitsü asoshi inyaka arudar.

Eat Right India ya National Health Policy 2017 den sendaktepa lir aser flagship sentongtem ajanga preventive aser promotive healthcare dak rangloker inyaker. Eat right school ya Eat Right India Movement kübok shilem ka lir, aser iba ya kaketshirtem dak rangloker lir aser school ajanga tangazükba balala agütsür.

Sentong ya Sainik School, Punglwa Vice Principal Lt. Col. Leena Bajaj-i okila jembia tenzük. Lai, kaketshisatsü bushiba aser saisapong, koba institution nung ajak dang tongtibangtiba ta züngshir iba dak alia chiyongtsü junga achiba aser kanga junga mejangba ajanga nisung ka nükjidong tongteta inyakba nung tongtibang shilem agitsü ta shia

kaketshirtem dang iba maongka tajung agia tangazükba aika angutsü ajungshi.

Kasa mapang nung Food Safety, Dimapur Zone, Designated Officer Samuel Zehol-i, FSSAI, iba sentong indang features aser state nung hierarchical structure indang metetdaktsü. Paisa, food safety koda tongtibang iba indang jembiba den kaketshirtem dang chiyongtsü tajung achiba yimya tajung sübatsü ayongzüka.

West Bengal nungi FSSAI Empaneled partner Souvik Das aser Delhi nungi Vinod Kumar nati inyakyim balala ayongzüka agia kaketshirtem nem tangazükba agütsü. Inyakyimtem rongnung kaketshirtem nem chiyongtsü tajung aser tamajung jangjadaktsüba, healthy diet plate draw asüba, best before date aser FSSAI License number amala chiyongtsü pongdangtem nung label tem aliba züngdaktsüba, chiyongtsü jangja item ajanga nutrients agütsübatem metetdaktsüba, temang nung tenük telen balala shidakja item tenük nüngdaker aser kechi chiyongtsü achiba ajanga item ya angur item indang jangjadaktsüba densema liasü.

Iba sentong nung class VI nungi X tashi nung aliba kaketshirtemi shilem agia liasü. Sentong ya Senior Master Kanu Barman-i tepela o jembir tembangba liasü. Sentong tembangba sülen school indang kitchen aser mess asadanga mangaoka yua liasü.

Railway stations 508 ... (TAPAK 1 NUNGI...)

Tenem agi sünga aliba state atema ibai Nagaland nung aliba nüburtem asoshi temoatsü tulu lir, kong lenmang tesendaktep kanga mesüa lir, ta pai ashi.

Northeast India nung mazüngtiba railway station tem rongnung Dimapur Railway station ya tanabuba jenjang nung lir. Ibai nisung aser oset belenba nung amshiba kisüng masü saka asen linük security asoshi kanga tongtipang lir, kechiaser yangi asen security forces kanga mela senzüteter, ta pai ashi.

Ato Kilonser Narendra Modi aser Railway Ministry lenisüba kübok Central sorkari Dimapur shimba atema Governor-i pelaba lemsatep aser iba yagi Nagaland ainba aser terenlok nung yaritsü amanger, ta shisem.

Dimapur Railway station ya sen crore 283 agi küm ana ser

tesadang nung world class railway station kuma yanglushitsü.

Tang yanglutsü benoka aliba main station building ya tasazük 17,484 sq metre asütsü, aser tang aliba station ya tasazük 5160 sq. metre lir.

Iba den külemi 'waiting area' tesadem asütsü aser yangji passenger atema retails, food plazas, metzü meshiba aser tajemtsü tzü amala angutsü. Yangji lifts 21 aser escalators 22 alitsü. Maneni Dimapur Railway station nung green buildings, energy saving, solar panels, fire fighting, rainwater harvesting, wastewater/stormwater reuse aser solid waste management amala tesem alitsü.

Dimapur Railway station nung iba sentong agidang Advisors H Tovihto Ayemi aser Moatoshi Longkumer natia o tatsütsü jembia liasü.

Kohima nung Employees' ... (TAPAK 1 NUNGI...)

Iba sentong tembangba sülen maneni sentong nung adener temang angati repranga liasü aser iba scheme kübok register süa aliba mapa inyaker atema Aadhaar seeding agia liasü.

Iba sentong nung establishment ter nungi mapa inyaker 85-i shilem agia liasü.

Taoba mapang iba ama

Awareness cum Medical Health Camp ya Dimapur nung July 22, 2023 nü agia liasü. Iba mapang mapa inyaker nisung 148 shi aden aser parnoki angati temang repranga liasü.

Maneni tarutsü anogotem nunga ano tesem balala nung iba ama awareness sentong ya ayongzüksü, ta department ajanga metetdaktsü.



August 06, 2023 nü New Delhi nung BJP MP Manoj Tiwari aser MP Ravi Kishan na den taoba mapang Puducherry nung Lt Governor, Kiran Bedi nungeri 'Amputation-Free India' campaign tenzüksü tangokba noksa nung angur.

Railway station 508 yanglushitsü atema PM-i sentong tenzüksü

New Delhi, Luroi/August 06 (Agencies): Amongnü Ato kilonser, Narendra Modi-i linük tesem balala nung railway station 508 jungjunga yanglushitsü atema video conferencing ajanga sentong tenzüksüog.

States aser union territories 27 nung railway station 508 yanglushiba nungji sen crore 24,470 shi indoktsü. Item railway stations rongnung Uttar Pradesh nung 55, Rajasthan nunga 55, Bihar nung 49, Maharashtra nung 44, West Bengal nung 37, Madhya Pradesh nung 34, Assam nung 32 aser Odisha nung 25 lir.

Punjab nunga railway station 22 yanglushitsü, Gujarat nung 21, Telangana nunga 21, Jharkhand nung 20, Andhra Pradesh nung 18, Tamil Nadu nunga 18, Haryana nung 15 aser Karnataka nunga railway station 13 yanglushitsü.

Linük nung railway station 1,309 yanglushitsü atema Amrit

Bharat Station Scheme tenzüka liasü, aser kasa scheme kübok tang railway station 508 yanglushitsü.

Iba sentong nung jembidang Modi-i, opposition party temi politics tamajung asayar, ta aitsü.

Opposition teloktep INDIA tenüng metetshii Modi-i, sorkari inyakba ajak anema nokdakba telok ka lir, ta ashi. "Asen linük nung opposition telok kati tanü-a akhi yimya maneni benshir. Parnoki kecha meinyaktsür aser tangar nema kecha meinyakdaktsütsü meranger. Linüki Parliament building tasen yanglu. Parliament ya linük democracy indang temaitsü lir. Iba nung ya sorkar aser opposition naprongla lir, ajisüaka opposition telok yagi Parliament building tasenba anema liasü," ta pai ashi.

"Onoki Kartavya Path yanglushi saka parnoki ibaji-a ashishia liasü. Küm 70 tashi

nung parnoki linük nung tasütait sepaitem atema war memorial ka danga meyanglu. Onoki National War Memorial yangluba mapang nunga parnoki taaktsü makai yimjak nung aija liasü," ta pai ashi.

"Alima nung building talangtibaji Sardar Vallabhbhai Patel indang 'Statue of Unity' lir aser iba atemaji India nunger ajaki nüma atanger, ajisüaka yimtenren party kar nungi lenirtemibo iba kürakyangluji mesem dang," ta paisa metetdaktsü.

Opposition teloktep INDIA aija, Ato kilonseri, "Onoki politics tamajung yutsür mission mode nung politics tajung lenmang nung jajar aser terenlok atema nendaka inyaker. Quit India Movement ajanga ajungmesoa linük nüburtem ajaki: ochimashi - India tokjang, kibongi yimsüsüba - India tokjang, mesüzükba- India tokjang, ta ashir," ta metetdaktsü.

Tanü Rajya Sabha nung Delhi Services (amendment) Bill benoktsü

New Delhi, August 06 (Agencies): Hombarnü (August 7) Rajya Sabha senden nung Government of National Capital Territory of Delhi (Amendment) Bill benoktsü, aser iba dak sendakba nung Aam Aadmi Party (AAP)-i Rajya Sabha nung party züngsemtem dang August 7 aser 8 anogotem nung senden nung ajak medemtsü tuyuogo.

Taküm Supreme Court-i obendang ka ajanga Delhi nung ketdangsertem posting aser transfer tashi Delhi sorkar nem agütsüba sülen May ita nung Centre-i Government of National Capital Territory of Delhi (Amendment) Bill renema liasü.

Lok Sabha nungbo iba bill agizükogo aser Hombarnü Rajya Sabha nunga iba bill benoka o lemtepa sülen agizüktsüa akok.

AAP-i Rajya Sabha nung party züngsemtem dang, "Rajya Sabha nung Aam Aadmi Party (AAP) züngsem ajak dang August 7-8 anogotem nung anüng dang 11:00 ako nungi senden metembang tashi

senden nung alitsü aser party tangatetba pusemstü mepishia metetdaktsür. Iba ya kanga tongtibang, ta züngshitsüla," ta metetdaktsü.

Iba bill dak sendakba nung Congress party-ia AAP pusemer, ibayongji Congress-ia Rajya Sabha nung party MP tem dang Hombarnü senden nung ajak medema alitsü metetdaktsü.

Taoba hopta Lok Sabha nung Government of National Capital Territory of Delhi bill atema o lemtepa sülen voice vote ajanga agizüka liasü, iba mapang nungji opposition party balala nungi züngsemtembo senden nungi ayazüka ao.

Osang angazükba agi, Rajya Sabha senden nungji opposition tsütsülen nungi Congress lenir aser Supreme Court lawyer, Abhishek Manu Singhvi-i tama jembitsü.

Rajya Sabha nung BJP-i aniba NDA teloktep aser opposition teloktep INDIA na züngsem kasasa shi dang lir, ajisüaka Biju Janta Dal(BJD) aser YSR Congress nati iba bill pusemra NDA vote teimba küma iba bill agizüktsü.



August 05, 2023 aonung Jharkhand state kübok Girdih district nung aliba Barakar ayong nung bus ka tsükoka aliba noksa nung angur. Iba lendong nung nisung asem asü aser nisung 24 yirua liasü.

Delhi nung raradang nisung ka khasetba ken o angadangtsü

New Delhi, August 06 (Agencies): 2020 küm northeast Delhi nung rara adokba mapang nung nisung ka injang agi yiruja meküzmükteti asüba tatalokba dak sendakba nung tai tonglokja alir nisung trok anema ken o angadangtsü Delhi Lieutenant Governor V K Saxena-i melaogo, ta Amongnü Raj Niwas nung ketdangsertemi metetdaktsü.

2020 küm Delhi nung raraba mapang February 24 nü New Mustafabad kiyong nung alir

arrshi küm 25, Shahid alias Allah Mehar khaseta liasü. Iba ken o bushisüng dangba ajanga, Citizenship Amendment Bill anema longkak aitba tenüng amer asalentong tamajung yanglua liasü, aser ibaji ajanga Delhi kübok North-East district nung rara adoka liasü, ta ketdangsertemi metetdaktsü.

Iba tatalokba sülen March 1, 2020 nü Dayal Pur police station nung Mohd Firoz, Chand Mohd, Rais Khan, Md Junaid, Irshad aser Akil Ahmed nunger

anema ken o benoka liasü. Parnok troki Saptarishi Ispat aser Alloys Pvt Ltd building telungi ia office nungi auyaba aser iba mapang nungji office kilem nung Shahid dak injang khaloktsüba nangzükogo.

Iba ken o bushisüng dangtsü atema Crime Branch nem agüja liasü. Delhi Lieutenant Governor-i Code of Criminal Procedure (CrPC), 1973 kübok Arrla 196 (1) nung ajemdaker parnok trok anema ken o angadangtsü melaogo.

J&K kübok Rajouri aser Poonch nung kiralongrar telok asem lir

New Delhi, August 06 (Agencies): Jammu & Kashmir kübok Rajouri aser Poonch district na nung tang kiralongrar telok asem lir, ta police ketdangser kati metetdaktsü.

Additional Director General of Police, Mukesh Singh-i, security sepaitemi iba region nung kiralongrartem meshimeshia samatsütsü meranger, ta metetdaktsü.

"Iba region (Pir Panjal) nung kiralongrar telok ana-asem shi lir. Telok shia nungji züngsem ana-asem shi lir, ajisüaka tejangjabo meshitetsü," ta Singh-i metetdaktsü.

Honibar nungi tenzüka Rajouri nung kiralongrartem aser sepaitem tsüngda maneni raradar. Honibarnüa kiralongrar ka khasetogo aser tang tashi pa maitsüji mejangja saka Pakistan nunger asütsüa akok ta bilemer. Pa ket nungjagi AK prangpong ka den pistol ana aser injang aika nguogo, ta police ketdangsertemi metetdaktsü.

"Budhal kübok Gundah-Khawas yim dak kiralongrar kar aliba jangjaba sülen police team ka iba yim jagi ao aser iba osangji army nem-a metetdakja liasü. Kiralongrartem longbanger mita aoba mapang nung kiralongrartemi tama injang khaloktsü. Iba sülen police, Army aser CRPF senpeter parnok den raradang kiralongrar ka khaset," ta Singh-i metetdaktsü.

Pai asemba süoshi, pa ket nung aliba mozü aser tsüngsem apibo pa ya Pakistan nunger kiralongrar asütsüa akok, ta paisa shisem.

Tawa sepaitemi tatalokba balala nung kiralongrar trok khasetogo; July 18 nüa Poonch district kübok Surankote area nung sepaitemi kiralongrar pezü khaseta liasü.

2021 küm nungi tenzüka tang tashi nung Jammu & Kashmir nung kiralongrartemi amak dang sepai 29 süogo, aser iba nungji taküm kija nung sepai 13 astüba densema lir.



New Delhi, August 06, 2023: Amongnü Jantar Mantar, New Delhi nung Delhi Meitei Coordinating Committee-i ayongzükba longkak aitba sentong ka nung Manipur nung raraba mapang asürtem Meitei nunger noksa ka maloka aliba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, LUROI (AUGUST) 07, 2023

Shisa aneti aotsüla

Solomoni Tsüngrem dang shisatsü meshi saka asenokibo sen dang meshi südi, anungji asenok nem sen dang agütsü aser sen jagi asenok asükuma japujaria senzü, takar, tulus aser yimsüsür akümtsü toktep aser tali tali moromorua aküm, anungji ochimashitsü tenzük aser tangbo sensaker dang nungi taoba sentsütsür kümer asenok ajak shisatsü aneti aotsüsa kümogo. Asenoksa süaka kar sayutsüngia jajar saka karbo government gari aser sen bener seplepa senzür ta asüba anogotema liasü. Ashiko, tanüa asenok karbo iba tia nung alitsüa akok. Aji oda, tanü asenoki sen aginüba, bushiba aser penbuba jakla, inyakyim aser mapa ya reprangdangra tesüngmangtsüka lir. Aji oda, asenok shisatsü agi mapa tasen tasen purapiteta inyakba ajanga sen angutsü meranger masü saka mapa meinyak ser sen aika agizüka agitsü meranger. Iba mapa yabo asenokisa tajungba inyakteter, kechiyong tesüngmangtsü kaji kecha tenokdangba melii table aika ajanga mapa meinyak ser tiyazü sen melamelaa agizükter aser ano tiyazü senji table majangisa temelaba agizükter. Aji oda, alima nung mapa meinyak ser bill yanglua agiba aser commission meshiba nung tetoktepba ka alinungbo, asenoki tematiba takok jenjang ngula. Ajisüaka, mapa meinyak ser tiyazü bill aser commission nungi anguba senji kwi ngudir nguang temoatsü masü, anungji iba jagi mazükmaruang adentsü. Asenokibo aji magizüktertsüa akok aser mamangtsüa akok saka tanü asenok mazükmaru atenba yabo asangsang, anungji amangdi. Aji oda, asenoki sen-sen dang bushia-bushia sen bushitsü len memetet aser mashi kümogo, anungji tangari menang süra amentsü aser nokdangang süra nokdaksü ta asüba tia ka nung asenok shisaramar lir, anungji asenok shisa aneti aotsü nungdaker. Joko, asenoki sen agi kechisarina angur ta asüba tangatetba to toktsür sen agi masü shisatsü agidang kechisarina angur aser inyakteter ta angatetdi. Atangji, sen lira mazüngmashiyonga jangratema alir ta mapang kabo asenoki angateta liasü. Kasaji, sen lira tatidang junga magütsüyonga takok angur ta tangatetba ka liasü. Ano, kasaji sen lira government mapa-a tulu angutsü ta amang. Atangji, item ajakji atalokba nguogo aser item jagi nübortem dang masü saka peia kangshia alitsü. Aji oda, sen lira ojang ta amangba aser kecha meinyak aser kecha memetet ser sen agi anguba jenjangtem to pongmang nung shi den chiyonga pongmangba medem tanü item to asen ket nung maka kümogo. Joko asenok atema sen masü shisatsü nungdaker aser shisatsüjibo Tsüngrem nungi dang angutsü, anungji Tsüngrem dangi shisatsü aneti aotsüla. Atangji, asenoki meshira Paibo agütsütsü saka asenoki Tsüngrem nungi shisatsü aginübaji kechi atema aginür ta asübajiang tongtibangba lir. Joko, sen lira mapa angutsü aser sen lira mapa ajak nung takok angutsü, election nunga adoktsü ta asüba tangatetba aser tamangba to tiyazüa ta asenoki angatetsüla. Sen kijai takok anguba takok tobo asenok anisüngzük angutsüba takok masü saka timtem shisabolu aser takoksa angutsüba takok liasü ta asenoki metetogo. Iba metetba aser angatetba kijajia Tsüngrem nungi aruba shisatsü lir. Iba nung jagi asenok nüji aküm tenzük. Aji oda. Tsüngremi asenok nem asen nübortem asoshi mapa tenzüka inyaksüba shisatsü, idea, agütsübaji asenoki asen lenir aser yimsüsürtem den lemsateptsüla aser lenirtemia pei nübortem den shisalemsateptsü jangratsüla. Asenoki aiben teyari meshitsü atema nungdak adokba mapangang tulus aser yimten lenirtem bushia aoer aser lenirtemia election ama mapangang nübortem bushir, iba jagi asenok shisatsü agi anünger, kechiyong asenoki shisatsü masü sen bushir. Jogo, tang nungibo asenokbo lenirtem dena aser nübortem dena asen lima ajungtsü atema ajurutepa shisa bushitsü aser shisalemsatep tenzükdi.

OLEMSABANG

ALIMA KA YANGLU DANG KÜM AIKA SÜDAKTSÜR

~ S. Nuken, Naga United, Dimapur

Ans: Rom yimti yangludang küm 300 tashi nungang renemetet ta otzü ajanga angazüker. Asenoki kodang otzü bushidangdir tangar lima ya küm moklang 900 shi nunga tejak dang liasü ta angateter, asenoki tangar lima inyakba angubaji küm 60 shi ka asütsü, saka kanga aritepa jembir alitsü meranger inyaka sayur, alima tashitemetet aser mepong den lin0³r ta jembir saka asen lima kecha inyakteta mali. Otz aika lir mejembimatsü. Tanü asen Naga lima tilaka tenükmerem den tejashi O tamajungtem aika Naga nungertemi jembigo. Arishetepa azütoshi mapangtem ajuruogo, item ajak süi tema oadokogo asen Naga lima, asenoki jung junga bilemdangang. CM Rio aniba Govt. ya asen meimchir dang asünung Naga lima kunü yongi dangbo kum ishika tsüngda nungdangbo Nagalima arem ajak jagi New York City ama meyanglutetsü. Au, meimchir tang asü nung maremetet jembir südi, tanu Naga nunger khuret bena aliba ajanga pa tekolak asü nung aiben tamakok otzü jembir asutsü. Saka alima nung linerbosa nungsen khuret teti abener, dang aliba Govt. yagi mapa kecha meinyaker mejanga dang alir, tiazü dang jembir ta asteper, tanü shirnoki khuret bena lir parnoki metet, nai a khuret bendangang, nia mapatem balala nung khuret bena aruogo aika ajangshioogo tenungsang agutstsla nai aser nibo iba khuret mebentets, kanga meranga Nagalima yangludaki ano sang, Rio Govt. majung masü asen Naga nungertem majung, asenoki mepong nung o tulu jembir, tarutsü nunga shir telok arudir ano majungtsü, kechiba ta asungdangra asen inyaksangshi mapa agi syuadoker.

Q: Otzü bushirtemi shinübaji mapa task lir, kechiba süra parnok khuret majuru, khuret bendanga mali, tejembibo jembiteter ibajia tai magutsür, ola adoker mali nungbo na shiruru rongnung atentsüla, ochi tzüyim tarok nung mejanga lir tarutsü Govt atema jembiteper, kodang par party arudir car tasen, RCC tasen tamasa bushitsü, ochi to amatsü kechiaser iba atemaji mepongi sayuadoker.

Anungji asenok asoshi tepelemtsü aika lir. Ya asen lima kecha makaba aser madokba agi iba teimtem tepilemstü ya ajurur. Tanü Rio aser par Govt. linertemi Naga nungertem meima kümdakjang, iba lemanng yabo takar lemanng asütsü, ashiko taruba election nungjia Naga senso tajungi nenoksa yimli agutsütsü akok. Tarutsü nung Naga nunger aika takar akümtsü lemanng dak tashi tulu lir. Nungsentem arema CM khuret abenba asoshi tenungsang agutsür, Tsüngrem tsubua nü yimli merenangma.

NB: Tang aliba centre Govt. den teka amteper Naga lima yangluang, industry tem yangluang, car lemanngtemji yangluang, Airfield tajung karbo yanglua dokang, aiben jashia aruogo anena atadi, iba osang ya nenok tulus tem mepongden rarar ama tekümdaksü. Küm ishika sulen Nagalima takar asütsü chichiba Khristan lima akümtsü.

"Kibur maliba Dokan"

~ N.I. Yanger

Tesüiba küm ka/ana tejaklen Mizoram nungbo aluyimertemi parnoki züsentetba aonsotsü aser tanga oset-tsüset tem dokan nungji oset shiaji jenjang tejangja zülua maloktsür doktsütsü, iba denji temekütsü aliba pongdang ka yutsütsü, saka nisung shinga Mena malir, talirtemi pei taginüba oset, aonsotsütemji zülua aliba senji shitak pongdang nungji yutsür aotsü ta, yamaji inyakba osang züngshia kanga pangkaa aser süngmanga,oda Mizoram nunger Christiantembo kanga ochishir tesa ta pelaa liogo. Tawa ka Tsüsangra nungi Asangma/ Kelingmen ajanga Asetkong lenmangi MKG-i atudang Khanimo/Longjang aser Longpa lushi ajangdang kibur maliba aonsotsü dokantem aika ngua, ya asen lima nunga tangarsa memenepyonga tangatetba tajung kati arur südi ta kanga pelasete aonsotsütem ongzükbem, repzükbem alia bener kidangi shilangba tepelaji onsara tulu liasü. Oda asen lima nunga iba ama temolung lemteper kateta, tayokera nübo tsüka anogo piyong nüka mayoktsü aser taliria ochi shia pei taginüba oset jenjang shitak pongdang nungji inoktsütsü ta inyakbaji koda tajung. Asen otsüla oboula nunger kodanga ki dala agi mashi saka süng kati dang rüita yutsür senzü, tsük jendanga küpdang dang kati küpdanga yutsü nunga kodanga shingai mauya, ta aruba kin. Anungji tang kibur mamenba dokan koba inyakyim lir, item dakya lesson agia, inyaksangshi ajak nung ochi shitepa inyaktetra tangar kin danga asen Aor nüma tangtettsü, aser Tsüngrema pelatsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manipur nung rara anema linük tesem aika nung Khristantemi longkak ait



Punjab kübok Jalandhar nung denomination balala nungi Khristantemi longkak aidang tangokba noksa nung angur.

August 06, 2023: May 4, 2023 nü Manipur nung Kuki-Zo tsür ana mangsa anir senzüba aser Manipur nung rara anema London nung Khristantemi tejashi lemsatepa longkak aitogo.

London nung Women of North East India Support Network (WNESN)-i ayongzükba sentong nungji Khristantemi Indian High Commission kima Manipur atema ochi temeden akhangba den külemi rara ajanga takoksa angurtem den tejashi lemsatepba sülen Parliament Square tashi yimdong süa jaja.

July 27 nü longkak aitba sentong nungji parnoki, "Onok ola madokdaksür", "Ozü aianutem kümzükang," "Tetsür temangji tongbang raradak masü" densema parnoki ozülü balala amer liasü.

Parnoki longkak aita Indian High Commission

nungi Parliament Square tashi jajaba sülen Mahatma Gandhi kürakyanglu anasa longkak aitba sentongji tembanga liasü.

WNESN-i sangdong ka ajanga, "Manipur nung Kuki-Zo tsür ana den tejashi lemsatepa onoki longjemer jajar," ta metetdaksü.

July 29 nü Rajashtan kübok Jaipur nunga candlelight march sentong ka ayongzükba nisung meyrjang aikati Manipur nungertem den tejashi lemsatep. Parnoki "Tetsürtem akhümtsübuang," "Manipur nung rara anenang," aser "India nunger ajak kasa dang" ta ozülü amer liasü.

July 29 nüsa Punjab kübok Jalandhar nunga Khristan denomination balala nungi nisung 50,000 dak tema adenshia Manipur nung rara anentsü takhangba agüja longkak ait.

Jalandhar nung Arogoi temepishiba shidi ajanga India


Tir, Punjab Angh, National Commission for Women Chairperson aser district collectors ajak dang Manipur nung rara anentsü atema mera agiang ta temepishiba shidi zülüogo.

July 25 nü Mizoram state nunga Khristantemi tesem 42 tashi nung Manipur nung Zohnahthlak tribals tem tejashi lemsatepa yimdong süa jaja liasü.

July 23 nü Jharkhand yimtiba, Ranchi nung Jharkhand Christian Youth Association (JCYA)-i longkak aitba sentong ka ayongzükba Manipur nung yimjung atema takhangba agütsü.

All-Karnataka United Forum for Christian Human Rights (AKUFCHR)-ia Bengaluru nung yimjung rally ka ayongzükba Manipur nung aibelenertem pua temerenshi agütsütsüla, ta takhangba agütsü.

'Jesus Revolution' film ajanga Netflix nung Top 4 jenjang tongtetogo



August 06, 2023: Tan hopta 'Jesus Revolution' film ajanga Netflix nung Top 4 jenjang tongtetogo, aser Tsüngremi maneni iba film amshitsü imlar.

Bodhbarnü (August 2) Jesus Revolution ya Netfliz Top 5 nungi No. 4 nung liasü. Netflix nung iba film sayaba sülen anogo ana lirbo iba film ajanga jenjang 4buba tongteter.

Iba film nung California nungi pastor Greg Laurie indang otsü shia lir, aser iba film ajanga ano alizüing aika tongtettsüji pa nükjidong lir.

Laurie-i Instagram ajanga, "Asenoki iba film yagi #1 tongdaksüdi!" ta metetdaksü.

Paisa, "Netflix indang subscribers million 75 dak tema lir. Iba film ajanga osangtajung

agi nüburtem kongshitsü atema Tsüngremi iba film amshitsü atema asenoki sarasademdi," ta lemsatep.

Jesus Revolution film ya hippie evangelist Lonnie Frisbee (Jonathan Roumie) indang chichiba otsü lir; pai pastor Chuck Smith (Kelsey Grammer) den senteper 'hippies' telok ka Khrista dangi anir. Iba movement ajanga America tesem ajaklen asentenshi milak jangrua liasü aser iba mapang nungji hippies tem Khrista dangi arur tainlonglongtem rongnung Laurie (Joel Courtney)-a densema liasü.

Film Producer Andy Erwin-i, "Milak jangrudaksütsü atema Tsüngremi Frisbee aser Smith na amshia liasü. Arogo dangi 'hippies' anir aoertem rongnung Chuck densema liasü. Frisbee-i taküm mejungi ali (AIDS agi asü) saka Tsüngremi pa taküm shilem tuluka nung amshio," ta ashi.

Jesus Revolution ajanga US nung dollar sen million 52 ajangzükta liasü.

ANOGO ABEN TSÜNGREM DEN

Teyakyak Khristan Yimsü Mathi 28:16-20

Asenoki teyakyak Khristantem aser azümesen Khristantem jembiba tawa tanü kanga bulua jembiba angashir. Iba mapang ya azümesen Khristantem timba ama lir. Arogo nung züngsem aika akümer saka arogo mapa nung temulung agüja inyaker ishika dang adoker. Asenok nem züngdangba yanglutsü magütsü saka züngsem züngdangtsü agütsü. Tebilemtsüji kechi?

Mapa kaji aikati Kibubai mulungba nung Pa tenzüktsüba masü, asenok mapang, küm züngdanga tenzüktsü sapur. Tsüngrem mapa nisunger bilemba aser tashi nung inyaksü tamakoktsü. Anungji Kibuba mapang nung Pa tenzüktsüji tongtipang ta asenoki angatettsüla. Pa mapangji tejangja. Khristai tongmelang agi iba mapang agütsü: Nenoki oang aser kin ajak nütsüng kümdakjang, Tebur, Techir aser Tanela Temeshi tenüng nung baptijang, Ni nenok dang melaba ajak amshitsü sayuang. Mt. 28:19:20. Tasen Lai Khristan yimsü teyakyak liasü. Parnoki Yisu sayuba ajak amokmeren aser rishikangshi metsübui sayu.

Sarasadem: Temeim Tsüngrem aser Kotaker Tebu, Ne lima nung Khristantemi nendaka mapa inyaksü Nai aginer ta ni metet. Nai mulungba toktsür kü tejangraba nung tali temulung agütsüba ni nangzükter. Iba merumeru tebilemba kü dang yimlibilema tokang. Iba lima purtem meimtsü aser pelaseta Ne osangtajung parnok den lemsateptsü aser meimtsü kü dang yariang, Yisu tenüng nung. Amen.

Deeper Christian Life Ministry nung pastor, Sunday Okenwa süogo

August 06, 2023: Kanga lenir ka liasü aser pai pa nüngtugu sayutsüngir aser Kümtdakba, Kibuba aser Tesayur, Yisu Khrista küm 40 Chiedozie Okenwa August 2 nü tashi tenzükbaji mamatettsü," ta ashi.

Pastor Sunday ya UK aser Republic of Ireland nung Deeper Christian Life Ministry Overseer liasü.

Regional Overseers of Deeper Life Bible Church-i sangdong ajanga, pastor Sunday ya anibelem aremba lenir ka aser Khrista osangtajung prokba tongshi ka liasü, ta ashi.

Pastor Sunday ya Norfolk kübok Pakefield nung national youth & young adults' conference nung chairman inyakba mapang nung asü.

Deeper Life Bible Church-i sangdong ka ajanga, "Pastor Okenwa ya temeim aketba

Pastor Sunday nem tetushi agüja Premier Gospel's Station Director aser Head of Music Muiywa Olarewaju OBE-i, "Pastor Sunday ya Arogo lenir tajung ka aser tembar ka liasü. Pai anibelem arema kanga nendaka inyakba aser manokshitetba tamang ajanga Europe nung aliba Arogo nem tsüngsü tajung yutsüogo. Onoki par chirnurtem aser pa kinüngtsü Mary atema sarasademtsür. Onoki Pastor Sunday kodanga mamatettsü," ta metetdaksü. Arogoi tamangertem dang par kibong atema sarasademjang, ta mepishia metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Rongju

(n) süngküm aser au ayasar taju yangluba (bamboo spike)

* Alemlibo tsükchir den raratsü atema **rongju** amshi.

Rongjui

(n) küm nung ita tukobuba (September)

* Joko taküm küm-a taruba itabo **Rongjui** asütsü.

OLONG PAITEP # 6599

Grid for crossword puzzle #6599 with numbered squares.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latetsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6598 TELANGZÜBA


TIPIEN :

- 1. Aben, 4. Artsü, 7. Lisem,
8. Liwa, 9. Sarasadem,
12. Aket, 14. Mangu, 15. Anünü,
16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Sujuk, 10. Aonung,
11. Dokan,
13. Tinu.

**Agüja aliba noksa nung meputepi
aliba 10 bushiang**



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur Assembly session August 21 nü tenzüktsü

Imphal, Luroi/August 6 (Agencies): Opposition Congress densema lokti tentet balalai takhangba agütsüba mapang ka nung Manipur sorkari August 21 nü Assembly session ayongzüka amentsü atema telemtetba agiogo.

Ketdangsür kati ashiba agi, state cabinet-i Angh Anusuiya Uikey dang 12buba Manipur Legislative Assembly session 4buba August 21 nü ayongzüka amentsü atema benokogo.

State nung dang

mepetmesü tulu adoker aliba apir iba Assembly session nung tetenzük nungi ken o tatsük talem aika sensaksemtsü imlar.

Taoba Chief Minister Okram Ibobi Singh-i anir Congress legislature party-i July 26 nü Angh den ajuruteper aser Constitution Article 174 (1) kübok Assembly special session ka ayongzüka amentsü atema takhangba agüja liasü.

Congress lenirtem shirnoki Manipur nung President's rule benoktsü atema khanga

arudar, parnoki tang state nung mepetmesü tulu ataloker aliba sensaksemtsü asoshi state Assembly ya sabang ajak rongnung tajungtiba, kong tensa azüoka yimjung bener arutsü atema pei tebilembatem lemsatepa sensaksemtetsü, ta shia arudar.

BJP MLA tenet densema tribal MLA ter aser tanga kin balala lokti tentetemi May 12 nü nungi tribal tem atema administrations (state den saku) balaka tentettsütsü asoshi khanga arudar.

Assam: Kilir ka dak teka sangshiba atema police officer ka apu

Guwahati, Luroi/August 6 (Agencies): Assam, Golaghat district kübok Bokakhat tesem nung kidang yariteper tanur ka reshikangshia amshiba atema police assistant sub-inspector (ASI) ka puogo.

Aija aliba police ketdangsür ya Jayanta Bora ta jangjaogo, shiba Nagaon district kübok Jakhlabandha police station nung ASI ka lir.

Bora den pa kinungtsü aser tangar nisung anati Bokakhat nung par kindang arishi küm 12 tain tetsür chanu ka dak züka



Jayanta Bora

merenshi aser la khu mejepja liasü.

Bora kinungtsü Banshree Bora aser lar adianu Deepshikha Saikia nata iba ken

o dak sendakba nung puogo, ajisüaka bail nung chiokogo. Aija alir rongnung tongtiba Bora kinungtsü indang adianu Bablu Saikia tang tashi jenshia senzüdar.

Parnok ya nisung dak teka sangshiba, amokmerenba aser yirutsüba atema aija lir.

Iba tatalokba ya August 2 nü ataloka liasü. Child Labor Act kübok tang ken o ka benoka lir aser police temi tang Bablu Saikia bushiba mapang ka lir aser pa takaratiba nung aputsü ta temlung lema bilemer.

Manipur: COCOMI-i BJP sokar inyakyim nung shilem magitsü ayongzük

Imphal, Luroi/August 6 (Agencies): Coordinating Committee on Manipur Integrity (COCOMI)-i state nung Chief Minister N Biren Singh lenisüba nung BJP-i aniba sokar inyakyim nung shilem magitsü (social boycott) ayongzükogo.

Manipur sorkari Kuki nung telungpurtem den mangatetep aliba tembangtsütsü asoshi jenjang tapet magiba, National Register of Citizens (NRC) ajunga benoka inyaksangshi masüba aser state nung tang

mepetmesü ataloker aliba sensaksemtsü atema special assembly session ka ayongzüka magiba densema lokti takhangba balala mataloktsüba asoshi COCOMI-i iba tayongzükba ya agütsüogo.

COCOMI tir Jitendra Ningombam-i ashiba agi, sokarki nüburtem takhangba mataloktsü tashi iba inyakyim ya benoka inyaksangshitsü.

Paisa, Honibarnü telungpurtemi Kwatka Ward number 8 nung nisung asem tashi tepsetba aitsüogo.

Maneni COCOMI-i Kuki

telungpurtem inyakyim aitsüogo, shirnoki Honibarnü Torbung ground nung excavator amshia ki 100 shi raksatsüogo. Iba tesem ya Manipur puti otsü nung tongtibang tesem ka lir kong nungtugu Manipur nung Khamba-i aso 13buba nung tongtibang shilem ka agia liasü.

Soakra inyakyim nung shilem magitsü atema telemtetba agiba ajanga state sorkar dak kongshitsü akok, kechiyong COCOMI ya kanga tashitait lokti tentet ka aser parnok sülen anidaker aika lir.

Assam nung Japanese Encephalitis tashidak agi nisung 11 süogo



atema takokba tashi jenjang agitsü tetuyuba agütsüogo. Sorkar mozüki ajak dang iba tashidak agi tonger alirtem angati agi temang anepalutsütsü asoshi tetuyuba agütsüogo.

Guwahati, Luroi/August 6 (Agencies): Taküm küm tetenzüklen poktetba sülen Assam nung tang tashi nung Japanese Encephalitis tashidak agi nisung 11 süogo.

Kasa mapang nung state kübok tesem balala nung nisung 254 iba tashi agi tonger lir aser mozüki balala nung temang anepaludar.

Iba dak sendakba nung Assam sorkari state health department dang iba tashidak prokshia aoba nokdangtsü

Japanese Encephalitis tashidak potetba mangaoka lir.

Iba tashidak dak sendakba nung tangazükba agütsütsü asoshi state health department-i state kübok yimdak yimtsüngtem nung awareness campaign balala ayongzüka agia arudar.

Japanese Encephalitis Virus ya Asia nung viral encephalitis tongdaktsüba tongtibangtiba mesen lir. South-East Asia aser Western Pacific regions kübok linük 24 nung Japanese Encephalitis tashidak menatepa aotsü ana nung lir.

Asia nung iba tashidak ya timba lemluwa mapang menatepyonga aoer. Iba tashidak agi adongertem anepalutsü atema antiviral treatment kecha mali, ajisüaka tashidak nungi jenboa alitsü atema Japanese Encephalitis vaccines bo lir.

Russia-i Ukraine nung blood bank, university amak

Kyiv, Luroi/August 06 (Agencies): Ukraine-i Black Sea nung Russian tanker ka amakba sülen Russia aser Ukraine sepaitem tsüngta tesashiba rara arudang Ukraine nung blood transfusion centre ka, university ka aser aeronautics facility ka nung tayimtsü amshia amak aser raksatsü.

Ukraine nung rara tembangtsü asoshi China, India aser United States densema linük 40 nungi lenirtem Saudi Arabia nung adenshia senden amenba mapang Honibar aonung item tesemtem ya amak.

Anogo ana senden amenba nungi ano sangdong agüja mali.

Honibar aonung Ukraine anüdoklen Kupiansk jila nung blood centre amakba asoshi Ukraine ketdangsiir temi Russia tenüng asen, saka Moscow-i shimba ketdangsiir temibo Russia-i amokbanga aliba Donetsk region nung university ka raksatsüba ya Kyiv-i amshiba cluster munitions ajanga lir ta ashir.

Kharkiv region kübok Kupiansk nung amakba ya "war crime" lir aser yangji asü-amar lir, ta Ukraine Tir Volodymyr Zelenskyy-i ashi.

Ajisüaka pai nisung kwi asü mesüra yiruar mashi.

Russian sepaitemi "guided aerial bomb" amshia amak aser rescue workers temi mi remseptsü meranger, ta pai ashi. "Iba war crime ajanga Russia indang ajak sayur," ta pai ashi.

Zelenskyy-i osang ya sangdonger ghonda ishika lir Ukraine anüdoklen Moscow-i shimba Donetsk governor-i ashiba agi, Ukraine nungeri amakba mechi university building ka nung mi adoka lir.

Mangatetep aliba cluster munitions ajanga iba mi ya adok ta sayur, ta pai ashi.

Moscow sepaitemi Ukrainian aeronautics facility ka maka ano Kyiv sepaitemi Black Sea nung Russian tanker ka raksatsüir sülen tang ano iba lendong ya ajurur.

Iba aeronautics facility ya Motor Sich meyong lir, koba ajanga plane aser helicopter engine aser danga osettem yanglur. Iba tesem ya Ukraine anüdoklen Khmelnytskyi yimti

anasa lir, koba Kyiv southwest tsütsü mile 190 shi pilar lir.

Russia-i ashiba agi par sepaitemi Khmelnytskyi aser Rivne region nung military airbases tem amak aser target ajak nung junga kongshiogo.

Raksar aliba Russian tanker ya "civilian" rong lir, ta Moscow nung aliba ketdangsiir temi ashi aser Kyiv-i kiralongra mapa inyakba atema mang ayangtsü, ta ashi. Ajisüaka Ukraine ketdangsiiribo SIG tanker nungya ozü linük nung raraba Russian sepaitem atema totzü bener otsür liasü, ta ashi.

Iba rong amakba ajanga Kerch Bridge nung mapang tatsüka traffic anena liasü, koba agi Crimean Peninsula aser Russia sendakteper.

Hokulbarnüa Ukraine-i Russia nung Novorossiysk rongnendak maka liasü.

Saudi Arabia nung aliba Jeddah yimti nung ananü senden amenba ya Russia medeni yimjung lenmang bushitsü asoshi lir, ajisüaka Kremlin-i iba senden nung jembishinüba nung tenük yoktsü ta ashi.

Iba senden ya Ukraine-i anüolen linüktem dak alia ano iba rara nung par bukumtsü nungnanga alirtem ayongsemtsü nükjidong nung inyakba maparen nung shilem ka lir.

Zelenskyy-i küm tatemlen iba rara asoshi alima nung lenirtem senden ka amentsü molungtepdaktsüner, aser Jeddah senden manandang linük ana tsüngta jembishinü akatsü tongtipang, ta shia liasü.

Iba senden nung adenertem

tsüngta tangatetba balala lir saka tzüzüng-ozüng nung ajemdaker international order tanaben benoktsüla, ta pai ashi.

"Ibai kanga tongtipang lir, kechaiser food security tsütsü Africa, Asia aser alima nung tesem balala nung nisung million aika tia Peace Formula mapa kuma inyakba nung keta lir," ta Zelenskyy-i ashi.

"Iba ken o jembitsü asoshi sabang agütsüba atema Saudi Arabia dang pelar."

European Union ketdangsiir kati ashiba agi, iba senden sülen 'joint statement' magütsütsü saka Saudi nungeri tarutsü nung jembishinütsü asoshi sentong lemsateptsü.

Yangji alima nung food security, nuclear safety aser tepuokdak alirtem chiyoktsü asoshi jembishinütsü atema 'working groups' amenoktsü densema lir.

Ketdangsiir kati jembishinü junga kaogo aser yimjung ken o jembidang Ukraine indang litsüluka aser par temeden akumtsübotsü tongtipang ta züngzüktepogo, ta ashi.

Taoba mapang Copenhagen nung senden amendang China maden saka tang sendeni Special Envoy for Eurasian Affairs Li Hui yok aser India National Security Adviser Ajit Doval yoka liasü.

BRICS telok nungi Russia, China aser India den South Africa nungi Tir Cyril Ramaphosa indang security adviser Sydney Mufamadi aden aser Brazil indang top foreign policy adviser Celso Amorim video link ajanga dena liasü.

Pakistan nung train ka mükepoka nisung 15 shi asü

Karachi, Luroi/August 06 (Agencies): Deobarnü Nawabshah nung aliba Sarhari Railway Station anasa Hazara Express train ka indang takdang kar lenmang alema oa mükepokba lendong nung nisung 15 asü aser 40 yiru, ta osang ajanga ashi.

Ajisüaka iba lendong atalokba tesem anasa alisang Sanghar District Health Officer Faiz Mohammad Mari-ibo nisung 20 süogo ta ashi.

"Nisung tasümgang 20 aser yirur alir 50 tashi Government Hospital, Sarhari bushia bener ao," ta pai ashi.

Iba lendong atalokba tesem tonga aosang Sanghar Deputy Commissioner Ishaq Ahmed Gaad-i yirur alirtem ya Shahdampur aser Nawabshah nung aliba mozüki temia anir ao ta ashi.

Iba train ya Karachi nungi Rawalpindi lenir aorba liasü. Lendong atalokba tesemi police ketdangsiir aser rescue team tem yokogo.

TV nung sayuba video ka nung passenger aika lenmang alema tokor aliba bogies anasa adenshia liasü aser kar yangji longdaka liasü.

Honibarnep Padidan railway station anasa Allama Iqbal Express indang takdang ana lenmang alema tokoa lendong tulu nungi jenbur anogo ka lir tang iba lendong ya ataloker. Honibarnü lendong nung nisung asü-amaba mesüra yiruba meliasü saka iba railway lenmang nung traffic anena liasü.

Tanü atalokba lendong

indang ketdangsiirtemi metetogo aser nisung 15 asüba aser aika yiruba osang lir, ta Lahore nungi Federal Minister for Railways and Aviation Khawaja Saad Rafique-i ashi.

Train ya kanga kera jaja aliba masü ta tang tashinung bushiteta lir. Ketdangsiirtem lendong atalokba tesemi ogo aser Sukkur aser Nawabshah nung aliba mozüki tem nung emergency sangdonga lir, ta Rafique-i ashi.

Ibai lendong tulu lir ta Shaheed Benazirabad Deputy Inspector General of Police (DIG) Muhammad Younis Chandio-i ashi saka asü-amaba indang tejangja pai mashi.

Lendong atalokba tesemi aosang Nawabshah Commissioner Abbas Baloch-i ashiba agi, tekumzüker temi yirur alirtem mozüki balalai bener aor aser Pakistan Railway train ka teyari aser lenmang müreksü asoshi arutar.

Pakistan nung aiba ama lendong ya mapang shia ataloker, kong railway system kanga ajungbo masü.

2021 küm June ita train ana Sindh kübok Daharki anasa tsüktepa nisung 65 asü aser 150 shi yirua liasü.

Iba lendong nungya train ka anasa aliba train lenmang ka nung oa jioka lia passenger train ka arua atsük.

2019 küm October ita Tezgam express train nung mi adoka yangji mena aliba nisung 75 shi rongset aser 2005 küm Ghotki anasa train ana tsüktepa nisung 100 dak tema asü.

Niger mitkari Wagner telok dang teyari meshir

Bamako, Luroi/August 06 (Agencies): Niger tir menden nungi atsüngdoker alisang chioktsü atema anogo latettsüba tatem leni arudang Niger nung mitkar tashi amshia sorkar atsüngdokba mitkar lenirtemi Russia nunger sen yong raraba Wagner telok dang teyari meshia liasü.

Mitkar temi tashiyim amshia tir menden nungi atsüngdoksang ya mechiokra mitkar temi teka sangshitsü, ta West African regional bloc ajanga

amokmerena lir. Niger tir atsüngdokba mitkartem lenur rongnung General Salifou Mody-i kidanger Mali linük semdangba mapang pai iba teyari meshia liasü, kong pai Wagner nungi nisung kar den ajurutep, ta ashir.

Democratic yimya nung election ajanga shimsang Tir Mohamed Bazoum ya Deobarnü tashinung chioka tanaben tir menden nung mendakjang, ta regional bloc ECOWAS ajanga Niger mitkar

sorkar nem anogo züngzükjia lir.

Tetsüngtai ia yimjung ken o jembitsü telok ka Brehostibarnü Niger-i yokba linük telungi aittsü memela mesüra mitkari tentetba sorkar lenir General Abdourahmane Tchiani majurudaktsü aser iba sülen ECOWAS züngsem linüktem nungi defence tekolakpur temi teka sangshitsü atema Hokulbarnü sentong renem.

Mody-i Mali semdangba sülen mitkar temi teka sangshira Niger-ia akok tashi

raratsü aser "Libya tasenba" ama makumtsü, ta ashi.

Iba region nung kiralongrar anema raraba nung Niger ya West asoshi temolunglemtsü tembar linük tatemtsüba liasü. Saka mitkar lenirtemi par taoba yimsüsür magizük aser Russia tetsüi meyip.

Mali densema African linük ishika nung Wagner sepaitem lir aser yangji parnoki tashiyim amshir ta meimchir temeden asoshi nokdakba telok temi ashir.

MAPAIBO ATATETTSÜ, ASEN TANUR INDANG VACCINE AGITSÜBO MATATETTSÜ!

ASENOKI ASEN TANUR VACCINE TANGSA AGIDAKTSÜTSÜLA

IMMUNIZATION DOSES MAGI ALIBA ARISHI KÜM 5 KÜBOK TANUR ASER MASHISA ALIBA TETSÜR AJAK ATEMA

07-12 AUGUST 2023 11-16 SEPTEMBER 2023 09-14 OCTOBER 2023

MISSION INDRAJANUSHI-50

Be Wise! Get your child fully immunized

NER TANUR VACCINATION STATUS METETTSÜ ASOSHI ANASATIBA HEALTHCARE AGÜTSÜR DANG ASÜNGDANGANG

FOLLOW US @nhmnagaland @NagalandNhm

FOR MORE INFORMATION CONTACT THE Chief Medical Officer's Office/ Nearest Health Center.

World Cup: Netherlands aser Sweden na quarters-i iogo



Sweden tsür Lina Hurtig-i tatemangbuba penalty metsüoktsüba sülen külem asayartem den pelatepba noksa nung angur.

Luroi/August 6, 2023 (Agencies): Deobarnü tetsür World Cup round of 16 asaya nung Netherlands-i goal 2-0 agi South Africa madak takok ngua quarter-final-i iogo aser parnok taruba asaya Spain den asayatsü.

2019 küm World Cup nung tanabuba jenjang nung tembangba team yagi tetenzük nungi tasa tajung amshia asaya aser takok tajung ngutetogo.

Asaya nung Dutch team atema mezüngbuba goal ya Jill Roord-i minute tekububa nung idakja liasü. South Africa team ya ranking nung Netherlands dang nungi jenjang 45 agi tajemba lir aser parnok tang mezüngbuba knockout rounds nung asayatsü atema qualify süa liasü.

Asaya tanabuba shilem tom ka oa asayaba mapang Lineth Beerensteijn-i metsüba ball ka South Africa goalkeeper Kaylin

Swart-i junga menokdangteti Netherlands-i tanabuba goal idakja liasü.

Asaya nung African champions yagi mezüngbuba shilem nung goal idaktsütsü atema maongka aika ngutet saka ka danga magiteti liasü.

Netherlands team Hokolbarnü quarterfinals nung Spain den asayatsü.

Kasa asayamung nung tanga asaya ka nung Sweden-i penalty metsütepba sülen goal 5-4 ago defending champions United States team tsükdaktsüogo.

Mapang apuloktsür asayaba mapang tashi nung team kati danga goal midaktsütetba sülen penalty metsütepa liasü.

Deobarnü penalty metsütepba mapang Lina Hurtig-i Sweden atema tatemangbuba goal idakja liasü.

Lina-i metsüba ball ya US goalkeeper Alyssa Naeher-i line nung nokdang aser goal ai mai

jangjatsü atema VAR teyari agia liasü.

US atema Sophia Smith-i asaya akoktsü asoshi maongka liasü, ajisüaka lai ball ya cross bar adena metsütok.

Iba asaya nung Sweden goalkeeper Zecira Musovic-i kanga junga asayaogo aser lai penalty memetsütep tsüngda par goal nung metsüoktsüba ball 11 tashi nokdanga liasü.

Asaya ya US-i amokbanger asayar aser Sweden tsürtemi minute 85buba nungang goal nung mezüngbuba ball metsüoktsü danga liasü.

Kasa mapang nung America tsürtem rongnungi nungtugu asayar Megan Rapinoe, mapang apuloktsür asayaba mapang minute 9buba nung Alex Morgan melena ait, ajisüaka laia asaya akoktsüsa kecha temelenshi bener marutsüteti asaya tamakok nung tembang.

Stefanos Tsitsipas-i ATP Los Cabos title benogo



Los Cabos, Luroi/August 6 (Agencies): Greek nung top seed asayar Stefanos Tsitsipas-i Honibarnü ATP Mexico Open final nung Australia nung fifth seed asayar Alex de Minaur 6-3, 6-4 agi koka ita 14buba nung tang mezüngbuba asayamung ka kokogo.

Tsitsipas taküm Australian Open nunga runner-up liasü aser pai taküm final tasembuba nung ATP outdoor hardcourt asayamung ka kokogo. Pa Melbourne nung Novak Djokovic-i tsükdaktsü aser April

ita Barcelona nung Carlos Alcaraz-i final nung tsükdakja liasü.

Arishi küm 24 tain Greek nung asayar yagi Mallorca nung iba asayamung akokba sülen pa indang career nung asayamung 10buba kokogo aser taoba küm June ita sülen tang mezüngbuba asayamung ka kokogo.

World number 5 asayar Tsitsipas aser jenjang 19buba nung alisang de Minaur na tang tashi nung 10 ben asayar lir aser asaya ajak Tsitsipas-i kokogo.

Kasa mapang nung Minaur-i February ita Mexico nungsa Acapulco asayamung koker liasü.

"Asaya kanga tajung liasü. Final asaya kanga jenjang keta asayatetba atema ni kanga pelar," ta Tsitsipas-i ashi.

Asaya nung mezüngbuba set Tsitsipas-i amokbaner asayaba sülen tanabuba set nunga mezüngbuba game nung Minaur-i double fault ka mena pa indang serve break südaktsü, ajisüaka game trokbuba nung pai meyiper Tsitsipas indang serve break süa liasü.

Tsitsipas shibai final asaya nung first-serve points 28 nungi 23 nguteta liasü, pai maneni game tekububa nung Minaur indang serve break süa pa 5-4 agi tejakdang aküm aser iba sülen pa indang serve break mesüdaktsü pai iba asaya koka liasü. Tena tsüngda minute 86 asaya liasü.

Chennaiyin FC-i midfielder Ayush Adhikari alizükogo

Luroi/August 6, 2023 (Agencies): 2023-24 season metenzük tsüngda Chennaiyin FC-i Delhi nungi central midfielder Ayush Adhikari alizükogo.

Arishi küm 22 tain asayar ya Chennaiyin FC puri 2023-24 season metenzük tsüngda alizükba asayar 11buba kümogo.

Adhikari, RF Development League nung Kerala Blasters FC nungi asayaba mapang goal ka idaktsür lir aser I-League nung Indian Arrows FC nungi asayaba mapang assist ka süja liasü.

"ISL anaben tashi koker aliba team nung densemba atema ni kanga pelar aser coach Owen Coyle tawabangba kübok

asayatsü yonga atar, shibai taoba mapang lanur asayartem aika renloka aoba nung teyari agütsüogo. Ni anogo shia meranga inyaka taruba season nung team nükjidorong atongtsü atema teyari agütsütsü aser onok fan tem nema dangdangtsütsü imla atar," ta Adhikari-i ashi.

Adhikari professional ka ama mezüngbuba arishi küm 18 asüba mapang 2019-20 season nung Ozone FC nungi asaya aser iba sülen kasa season Indian Arrows-i ao.

2020-21 season nung Kerala Blasters FC-i aoba sülen pa iba team nungi Indian Super League, Super Cup aser Durand Cu nung asaya 30 nung shilem agia liasü.

GPBL Players' draft nung Mithun sen timba agi alizük



Bengaluru, Luroi/August 6 (Agencies): Grand Prix Badminton League (GPBL) Season 2 atema asayartem auction asüba mapang national champion Mithun Manjunath sen timba agi alizükogo. Iba asayamung ya August 27 nungi September 9 tashi asayatsü.

Bengaluru nungi arishi küm 25 tain asayar, shibai anogo ishika tejakdang Australian Open nung world No.7 asayar Loh Kean Yew koka liasü pa Chennai Superstarz puri Bengaluru Tigers den talangka toktepa sülen sen lakh 14.5 agi alizükogo.

Mithun, shiba indang base price sen lakh 8 liasü pa icon category nung lir.

Team tem nem international asaya anana shimtsü asoshi maongka agütsüba sülen international asayar 15 iba asayamung atema shimogo.

Sen tasaktiba agi alizükba asayartem rongnung Shin Baek Cheol tanabuba jenjang nung liasü. Pa Bengaluru Tigers-i sen lakh 14 agi alizükba liasü.

Korea nungersa Lee Dong Keun-a Gujarat Lions-i sen lakh 13 agi alizükogo aser World Championships bronze medallist B Sai Praneeth, Northeast Rhinos-i sen lakh 10 agi alizükogo.

Sen tasaktiba agi alizükba asaya pongu rongnung Ukraine

nunger Polina Buhrova densema liasü, shiba Mumbai Wolves-i sen lakh 9 agi alizükogo.

Taruba season atema asayartem auction nung team ti nungi asayatsü atema asayar 150 nungi asayar 80 shimogo.

Auction atema asayar 500 dak tema züngoksema liasü. Team tem ya Bengaluru Tigers, Hyderabad Hounds, Chennai Superstarz, Gujarat Lions, Kerala Tuskers, Mumbai Wolves, Pune Panthers aser Northeast Rhinos lir aser parnoki asayartem alitsü atema sen lakh 35 intoktsü temelaba agüja liasü.

Team shia nung icon player ka, Tier-1 player ana, Tier-2 players ana aser tetsür asayar anabosa alitsüla aser team temi international asayar ana dak tali malizükttetsü.

Taoba mapang India nunger asayar aser league director Arvind Bhat, -i, "asayartem asadanger team temi parnok indang squad yangluogo. Team ajak liromedema lir. Ajisüaka League atema onoki yangluba format repringdangra team mashikati asayamung akoktsü ana nung lir," ta ashi.

Taküm GPBL nung team ter asayadaktsütsü asoshi asayamung ayongertem sentong liasü saka team ana manisemtet.

BILEMDANGANG

"Tamang makatetera tejakdangi motettsü."